



**"REGIONALNA DEPONIJA MOŠĆANICA" d.o.o. ZENICA**  
Moščanica bb, 72000 Zenica, Bosna i Hercegovina  
Tel: 032 / 44 63 60, Fax: 032 / 44 66 34,  
www.rdm.ba e-mail: [deponija@rdm.ba](mailto:deponija@rdm.ba)  
Identifikacioni broj: 4218003170004, PDV broj: 218003170004,  
Registarski broj: U/I-3232/02 (Kantonalni sud Zenica)

Broj: 02-131/25  
Zenica: 07.03.2025. godine

Na osnovu člana 64., stav (1), tačka b) i člana 70., stav (1) i (3) Zakona o javnim nabavkama („Službeni glasnik BiH“, broj 39/14, 59/22), člana 35. Statuta Privrednog društva "REGIONALNA DEPONIJA MOŠĆANICA" d.o.o. Zenica a na preporuku Komisije za javnu nabavku, imenovane Odlukom, broj: 02-56/25 od 06.02.2025. godine u otvorenom postupku nabavke "Nabavka kamene frakcije" za **LOT2. - Nabavka krečnjaka granulacije 100-150 mm**, direktor Privrednog društva "REGIONALNA DEPONIJA MOŠĆANICA" d.o.o. Zenica (u daljem tekstu: Ugovorni organ) donio je:

**O D L U K U**  
**o izboru najpovoljnijeg ponuđača i dodjeli okvirnog sporazuma za nabavku kamene frakcije**

**Član 1.**

Prihvata se preporuka Komisije za javnu nabavku, broj: 02-130/25 od 07.03.2025. godine i okvirni sporazum za sukcesivnu isporuku krečnjaka granulacije 100-150 mm -LOT2. dodjeljuje se ponuđaču **LUMBERJACK d.o.o. Sarajevo** na osnovu njegove ponude, broj 013/25 od 24.02.2025. godine i to za ponuđenu cijenu od 75.880,00 KM bez PDV-a, kao najbolje ocijenjenom.

**Član 2.**

Prijedlog Okvirnog sporazuma dostavit će se na potpis izabranom ponuđaču LUMBERJACK d.o.o. Sarajevo, nakon što se ponuđači koji su učestvovali u natječaju obavijeste o izboru najpovoljnije ponude i Odluka postane pravosnažna i konačna.

**Član 3.**

Ova odluka objavit će se na web-stranici Ugovornog organa ([www.rdm.ba](http://www.rdm.ba)) istovremeno sa upućivanjem primjerka odluke ponuđačima koji su učestvovali u postupku javne nabavke, u skladu sa članom 70. stav 6. Zakona o javnim nabavkama.

**Član 4.**

Ova odluka stupa na snagu danom donošenja i dostavit će se ponuđačima koji su učestvovali u postupku javne nabavke, u skladu sa članom 71. stav 2. Zakona o javnim nabavkama.



## Obrazloženje

Postupak javne nabavke "Nabavka kamene frakcije" za LOT 2. Nabavka krečnjaka granulacije 100-150 mm za potrebe Ugovornog organa pokrenut je Odlukom o pokretanju postupka javne nabavke, broj: 02-55/25 od 06.02.2025. godine. Javna nabavka je planirana u Planu javnih nabavki za 2025. godinu i evidentirana je u istom pod rednim brojem 4. Procijenjena ukupna vrijednost javne nabavke je 95.000,00 KM bez PDV-a. Okvirni sporazum se zaključuje na period od najviše dvije (2) godine odnosno do iskorištenosti procijenjene vrijednosti javne nabavke, u ovisnosti od toga koji se od ova dva uslova prvi ispuni.

Javna nabavka je provedena otvorenim postupkom u skladu sa Zakonom o javnim nabavkama. Kriterij za ocjenu ponuda je "najniža cijena" prihvatljive ponude. Dana, 10.02.2025. godine na portalu javnih nabavki ([www.ejn.gov.ba](http://www.ejn.gov.ba)) je objavljeno Obavještenje o nabavci, broj: 362-1-1-59-3-12/25, a sažetak Obavještenja u "Službenom glasniku BiH", broj: 7/25 na dan 14.02.2025. godine

Komisija za javnu nabavku imenovana je Odlukom direktora Ugovornog organa, broj: 02-56/25 od 06.02.2025. godine.

Dana, 07.03.2025. godine Komisija za javnu nabavku dostavila je Zapisnik o ocjeni ponuda, broj: 02-130/25 od 07.03.2025. godine u postupku javne nabavke "Nabavka kamene frakcije" za LOT 2. Nabavka krečnjaka granulacije 100-150 mm.

U Izvještaju (Zapisniku) o radu Komisije je utvrđeno da je Komisija u skladu sa Zakonom o javnim nabavkama blagovremeno i pravilno izvršila otvaranje dostavljenih ponuda i njihovu ocjenu, o čemu je sačinila odgovarajući Zapisnik.

Na osnovu toga, utvrđeno je sljedeće:

- da su ukupno dostavljene tri (3) ponude,
- da su blagovremeno zaprimljene tri (3) ponude,
- da nije bilo neblagovremeno zaprimljenih ponuda,

Nakon izvršenog otvaranja ponuda, Komisija je pristupila analizi dokumentacije priložene u ponudama u smislu provjere njene validnosti s obzirom na iskazane zahtjeve Ugovornog organa u Tenderskoj dokumentaciji, odnosno vrednovanju ponude a u skladu sa procedurama i pravilima utvrđenim Tenderskom dokumentacijom i Zakonom o javnim nabavkama i svim pripadajućim podzakonskim aktima.

Na osnovu izvršenog pregleda i ocjene ponuda dostavljenih u postupku javne nabavke, Komisija za javnu nabavku je konstatovala da ponuda ponuđača "KOMGRAD-ZE" d.o.o., koja se odnosi na LOT 2, nije sačinjena u skladu sa zahtjevima utvrđenim u Tenderskoj dokumentaciji. Shodno tome, ponuda je ocijenjena kao nepravilna i odbačena.

U skladu sa članom 2. tačka l) podtačka 3) Zakona o javnim nabavkama, **nepravilna ponuda** je ponuda koja nije u skladu sa tenderskom dokumentacijom ili je primljena van roka za dostavljanje ponuda ili postoje dokazi o tajnom sporazumu ili korupciji ili nije rezultat tržišne konkurencije ili je ugovorni organ utvrdio da je cijena ponude izuzetno niska. Također, prema



članu 68. stav (4) tačka i) istog Zakona, ugovorni organ obavezno odbacuje ponudu koja nije potpuna i ne ispunjava zahtjeve iz tenderske dokumentacije.

Komisija za javnu nabavku je utvrdila da ponuda ponuđača "KOMGRAD-ZE" d.o.o. za LOT 2 ne sadrži Obrazac za povjerljive informacije (Aneks 5.), što predstavlja neispunjavanje obaveznih zahtjeva propisanih Tenderskom dokumentacijom.

U tački 14. Tenderske dokumentacije pod naslovom "Sadržaj ponude" jasno je navedeno da ponuda **mora** sadržavati najmanje:

d) *Obrazac za povjerljive informacije – Aneks broj 5.*

Također u istoj tački Tenderskog dokumenta je propisano da: ***"Ponuda mora minimalno sadržavati sve zahtijevane elemente kako bi se smatrala potpunom. Ponude koje ne budu sadržavale sve zahtijevane elemente biti će odbačene"***.

U tački 36. Tenderskog dokumenta pod naslovom "Povjerljivost podataka" propisano je da *"Ponuđači moraju napraviti spisak informacija koje bi se trebale smatrati povjerljivim na obrascu koji se nalazi u prilogu ove tenderske dokumentacije"*.

Dodatno, Tenderska dokumentacija u napomeni unutar Obrasca za povjerljive informacije precizira: *„Bez obzira da li ponuđač ima ili nema povjerljivih informacija, potrebno je da dostavi ovaj Aneks u svojoj ponudi. Ukoliko nema povjerljivih informacija može ostaviti prazne rubrike ili na bilo koji način označiti u rubrikama da ne postoje povjerljive informacije. Međutim, ponuđač mora u svakom slučaju popuniti na predviđenom mjestu: naziv ponuđača, potpis i pečat ponuđača.“*

S obzirom na navedeno, ponuđač je bio u obavezi dostaviti Obrazac za povjerljive informacije i u ponudi za LOT 2, bez obzira na to što je isti dostavljen u ponudi za LOT 1. predmetne nabavke.

Pored toga, u tački 18. Tenderskog dokumenta pod naslovom: **Način dostavljanja dokumenata koji su zajednički (ukoliko je podjela na lotove)**, propisano je sljedeće:

*"Ukoliko je nabavka podijeljena na više lotova, ponuđač koji dostavlja ponudu za više lotova **može dokumente kojima dokazuje da ne postoji razlozi za isključenje i dokaze sposobnosti** koji su zajednički za više lotova dostaviti na jedan od sljedećih načina:*

- a) *u posebnoj koverti na kojoj će jasno naznačiti da dostavlja dokaze za kvalifikaciju; ili*
- b) *uz ponudu koja je prva po redosljedu lotova na koji se prijavljuje; ili*
- c) *posebno uz svaki lot.*

**Ostali traženi dokazi i dokumenti koji se podnose za pojedini lot moraju se dostaviti u ponudi za taj lot.**

*Ponuđači mogu također ponudu dostaviti i na način da ponudu za sve lotove za koje dostavljaju ponudu zajedno sa kvalifikacionom i ostalom dokumentacijom uvežu u jedan zajednički uvez.*



*Ukoliko se dokazi da ne postoje razlozi za isključenje dostavljaju u posebnoj koverti ponuđač je dužan tu kovertu sa dokazima i kovertu sa ponudama za sve lotove za koje dostavlja ponude dostaviti u jednoj zajedničkoj koverti na kojoj će izričito naglasiti šta je sadržaj te kovertu".*

Identično je propisano i u članu 12. Uputstva za pripremu modela tenderske dokumentacije i ponuda ("Službeni glasnik BiH", br. 90/14 i 20/15).

Prema tački 18. Tenderske dokumentacije, dokumenti kojima se dokazuje da ne postoje razlozi za isključenje ponuđača iz postupka javne nabavke, kao i dokazi o sposobnosti ponuđača, mogu se dostaviti zajednički za više lotova. Međutim, Obrazac za povjerljive informacije (Aneks 5.) **ne spada u ovu kategoriju dokumenata**, jer ne predstavlja dokaz sposobnosti ponuđača (član 46-50. ZJN BiH) niti dokaz nepostojanja razloga za isključenje (član 45. ZJN BiH). Obrazac za povjerljive informacije se dostavlja na osnovu člana 11. Zakona o javnim nabavkama i služi isključivo za označavanje dijelova ponude koji sadrže poslovne tajne i povjerljive podatke, a ne za dokazivanje ispunjavanja uslova za učešće u postupku javne nabavke.

Shodno tome, ovaj obrazac se ne može smatrati zajedničkim dokumentom za više lotova, jer nije dokument koji se odnosi na kvalifikaciju ponuđača, već na zaštitu podataka u konkretnoj ponudi. Stoga je bilo neophodno dostaviti ga u svakoj pojedinačnoj ponudi za lot, kako je to propisano u Tenderskoj dokumentaciji.

Činjenica da je ponuđač dostavio Obrazac za povjerljive informacije u ponudi za LOT 1 **ne može ispraviti propust u ponudi za LOT 2**, jer je Tenderskom dokumentacijom jasno propisano da svaki lot mora sadržavati ovaj obrazac kao poseban element ponude. S obzirom na to da tenderska dokumentacija izričito propisuje da ponuda mora sadržavati Obrazac za povjerljive informacije (Aneks 5.), njegovo nedostavljanje čini ponudu nepotpunom i nepravilnom.

Također, u članu 57. stav (1) Zakona o javnim nabavkama propisano je da kandidat/ponuđač mora poštovati zahtjeve i uslove iz tenderske dokumentacije. Nepoštivanje ovog pravila rezultira odbacivanjem ponude kao nepravilne, što je dodatno potvrđeno članom 68. stav (4) tačka i) Zakona o javnim nabavkama, koji nalaže da ugovorni organ obavezno odbacuje ponudu koja nije potpuna i ne ispunjava zahtjeve iz tenderske dokumentacije.

**Na osnovu gore navedenog, Komisija za javnu nabavku je ocijenila da ponuda ponuđača "KOMGRAD-ZE" d.o.o. za LOT 2 nije pripremljena u skladu sa zahtjevima Ugovornog organa iz Tenderske dokumentacije, te da je u smislu člana 2. tačka l) podtačka 3) Zakona o javnim nabavkama i člana 68. stav (4) tačka i) istog zakona, nepravilna i kao takva se odbacuje.**

Nakon izvršenog pregleda i ocjene ponuda ponuđača LUMBERJACK D.O.O. i ponuda ponuđača TRGOŠPED D.O.O. KAKANJ, Komisija za javnu nabavku je ocijenila da su ponude prihvatljive i da ispunjavaju sve formalno-pravne uslove predmetne nabavke, te da se mogu unijeti u sistem e-aukcije.

Komisija je konstatovala da je u ponudi, pored navedene dokumentacije ponuđač TRGOŠPED D.O.O. KAKANJ dostavio i validne dokaze iz člana 45. Zakona o javnim nabavkama.



Utvrđeno je da nema neprirodno niskih cijena i da su ponude u okviru planirane vrijednosti nabavke. Ponuđači su najavili da nemaju namjeru vršiti podugovaranje u ovom postupku javne nabavke.

Na osnovu naprijed navedenih činjenica, Komisija je izvršila vrednovanje ponuda shodno utvrđenom kriteriju: "**najniža cijena**" prije e-aukcije te je na osnovu toga kriterija sačinjena rang lista ponuđača, kako slijedi:

Rang	Naziv ponuđača	Ponuđena cijena (bez PDV-a) u KM
1.	LUMBERJACK D.O.O.	85.907,00
2.	TRGOŠPED D.O.O. KAKANJ	85.988,30

Nakon toga, u sistem e-aukcije na portalu javnih nabavki unesene su sve prihvatljive ponude i zakazana je e-aukcija na dan **07.03.**2025. godine u 10:30 sati.

Nakon provedene e-aukcije, prema "Izveštaju o toku i završetku e-aukcije", rang lista ponuda je sljedeća:

Rang	Naziv ponuđača	Ponuđena cijena (bez PDV-a) u KM
1.	LUMBERJACK D.O.O.	75.880,00
2.	TRGOŠPED D.O.O. KAKANJ	77.499,00


Komisija je konstatovala da nije bilo neprirodno niske cijene.

U postupku donošenja ove odluke, posebno su cijenjene činjenice da je Komisija pravilno i potpuno izvršila ocjenu kvalifikovanosti ponuđača, te ocjenu prispjele ponude u skladu sa Zakonom o javnim nabavkama i kriterijima iz Tenderske dokumentacije.

Uzimajući u obzir naprijed navedeno, primjenom člana 64., stav (1), tačka b) Zakona o javnim nabavkama, odlučeno je kao u članu 1. ove odluke.

#### **POUKA O PRAVNOM LIJEKU**

Protiv ove odluke može se izjaviti žalba Ugovornom organu, najkasnije u roku od 10 (deset) dana od dana prijema Odluke.



**Direktor**

*Mia Pojskić*  
**Mia Pojskić, dipl.oec.,cr.cir.**

Dostaviti:  
1x LUMBERJACK D.O.O.  
1x TRGOŠPED D.O.O. KAKANJ  
1x KOMGRAD-ZE d.o.o.  
1x a/a